

- 68 Igitur cor amplius tuum non turbetur,
In risum tristicia tua convertetur;
Si Fortuna forsitan tibi adversetur,
Sis audax, non fugias, nam ut hec fugetur,
Spem habebis comitem, per quam vincetur.¹
- 69 Hiis dictis evanuit dea tam ameni
Vultus, et colloquii maxime sereni.
Et ecce mox dominam iuxta me inveni,
Que priusquam loquerer, dixit verbo leni:
'Fili mi, non dubites, Spes sum; ad te veni.'
- 70 Ista vero graciis variis repleta,
Pulcra, decens, humilis, hilaris et leta,
Laborabat manibus, animo quieta,
Nec eam vexaverat aliqua dieta,
Cum semper prosperior immineret meta.
- 71 Loquelam hec domina protulit lenitam:
'Fili mi, non dubites, nam te non dimittam,
Nam dabo in prosperis tutam tibi vitam,
Quo usque te Fronesis thalamis inmittam.
- 72 Per me Petrus sustulit crucis cruciatum,
Latusque Laurencius habuit assatum.
Nicholaus habuit sanctitatis statum,
Et Agnes custodiit corpus illibatum,
Ut sic se perducerent ad finem optatum.
- 73 Ego sum que facio iuvenes armari,
Que equos equitibus facio crepari,
Fortes frangi lanceas, galeas quassari.
Ista ab hominibus solent tolerari,
Quando post angustias sperant delectari.
- 74 Per me latro credidit, in cruce levatus,
Et miles quo dominus fuit perforatus.
Iudas me non habuit, ideo dampnatus
Atque per spem medici magis est sanatus,
Quam per ipsum medicum morbo fatiguatus¹.
- 75 Quid moror? hic facio more stabilito
Labores peragere, quos ego non vito,
Et tandem ad gaudia paradisi mitto.
Adhuc ergo sustine, nam tibi promitto,
Quod id quod desideras obtinebis cito.'
- 76 Ob hec et dulcedinem sui pulcri visus
Nimis de clemencia domine confisus,
Amplexabar dominam quasi indivisus,
Sed caste, et lacrimas convertens in risus,
A sompno et sompno surrexi gavisus.

1) Sic! Der Sinn ist mir unverständlich.